



SC-i state/UTs dang school nung 'sanitary pads' agütsütsü tuyu

LKM pur 34 buba saisapong benjong takok manung mungogo



VOL. XXIII ISSUE NO. 108 (ADOK 108) DIMAPUR KÜPTOKNÜ (SATURDAY) AENJETI (JANUARY) 31, 2026 ₹ 5.00

Ao kin Tsüngrem dang temenen nangzükba sarasadem sentong agidagi

Mokokchung Aenjeti/January 30 (TYO) : Ao kini Tsüngrem dang tatok nangzükba ji mezügbuba jenjang, joko ozü kini temenen toktsüdi ta Tsüngrem dang Pai mulungba ama lidi ta nangzuka Tsüngremi mulungba inyaksü taküm bendanga agütsüba tamaitü lir, anungji Ao kini asüng (January 31,2026) tashi nung tatok nangzükba kelen ano kasa temen beshia ora Tsüngremi Aotsür Aor dang kangasa mepelatsü ta Rev. Dr. Kari Longchari Ao kin Tsüngrem dang temenen nangzükba sarasadem sentong nung jembidang ashi.

Ao kini temenen toktsür melenshitsü mulungtetra, Tsüngremi Ao kin moatsütsü, Tsüngremi Ao kin meleptokdang Ao kini asenok sasa asenok samatsüsa alir, Aorji tesüngmangtsü jenjang ka nung Tsüngremi anitet, anungji Ao kinji tangar raksatsüba telok ka masü saka tangar yarıba kin ka kümdı. Ao kin kanga dang kümdanga alitsü mapang ka lir, kechiaser Aori tamajung leni aniba agi joko tangbo Aor sülen anidakar mali ta Tsüngrem tenzüker Kari Longchari-isa ayongzüka jembı.

Sentong nungsa Ao Senden Tir Wb. Marsanen-ia



MTBA tenla kidang January 30 aonung Ao kin Tsüngrem dang temenen nangzükba sarasadem sentong agidang Rev. Dr. L. Kari Longchar, Ao Senden Tir Wb. Marsanen Imsong aser ABAM Executive Secretary Rev. Temsü Jamir nungeri jembidang tangokba noksa.

tayongzükba o jembidang asen Ao kini tatok nangzükba kelen ano temenenjisa beshia ora majungtsü, anungji liyonga aotsüba ji tongtipangba lir ta ashi.

Ao Senden Tir-isa Tsüngremi Ao kin nem tamangba yimsü aser tashi temetet nung Naga nunger rongnung samanir asütsü tambo senmang agütsü, saka Ao kini Esau-i auso ka yong tambu senmang ayokba ama Ao kini ochi mashiba mapa balala inyakba ajanga tambo senmang yoka achir asü ta arok aroka shisadangdi ta tesenteper ayongzüka jembı.

Aorji kanga dang shisa taka tangari memener, Aor shisa

takaji benteper alima indaktsütsü asoshi inyaker masü saka kati ka magizükteper, anungji asenok idakji tsükdaker lir, anungji iba temenen tera ya atsüdoka intokdi ta Ao Senden Tir-isa ayongzüka.

Ao Baptist Arogo Mungdang Executive Secretary Rev. Temsü Jamir-ia tayongzükba o jembidang iba sarasadem sentong Ao kini temoatsü meshitsü asoshi masü saka Tsüngrem anasai aotsü mapang tajung lir, anungji Ao senso ajaki asüng (January 31,2026) teroto 12:00 ako tashibo sorochoikba takdang melapoki Tsüngrem külema sarasademtsü kanga tongtipang,

tang yabo Ao kin Tsüngrem dangi meyipba mapang südi, temenen tatok nangzükba nungji taküm nung takok aser temoatsü lir ta ayongzüka jembı.

Iba sentong akaba ajanga Ao kin dak sobaliba tamajung aliba intokdi. Naga lima mashileni aobaji asen Aori mashileni aniba agi li, anungji Aotsür Aor chanu sorkar mapa nung inyaker aser Private sector nung inyaker ajaki nentaka inyaksüla ta Executive Secretary-isa ayongzüker.

Nagaland nung NLTP Act-ji sorkari mapa küma meinyakra mapa küma inyakang ta shidi, yimden mesüra lokti balala tashi ajanga election mapang free

polling soita ayuba asoshi Aori obang ka sür temenen dang temenena ta tasü ita noktakdi. Iba sarasadem sentong ajanga Ao kin asentenshiba mapang, Ao kin yanglushiba mapang ka südakjang ta Executive Secretary Rev. Temsü-isa ayongzüka jembı.

Sentong nung Tsüngremer lenisüba jazüka ABAM Tir Rev. Odisashi ajanga sarasadem tenzüker, Pastor Rev. Ponon Longchar ajanga Ao kin Tsüngrem dang temenen nangzükba sarasadem sentong ayongba nükjidong rasaa ashi aser Mokokchung Compound Baptist Arogo Choir ajanga temeja ken ka tena tekülemertem tanela nung ajungmeso aser iba sentong Pastor Rev. Dr. Bendang Longkumer ketdangsuba nung agia liasü.

Iba sentong nung denomination balala nung, Ao arogo balala nungi aser linük tenzüker telok balala nungi arua aden aser iba sentong ya ya Mokokchung Town Ao Baptist Churches Mission ajanga parnok tenteter kümzüng 25 ajungba nüngtem nung sarasadema ayongzüker lir.

January 31 anogo anepdang 6:00 ako nungi 12:00 ako tashi lumia sarasademba sentong Tsüngrem tenzüker balala ajanga agitsüba renema lir.

Amit Shah-i Assam Assembly complex tanabuba lung azüngtsü

Dibrugarh, January 30, 2026 (Agencies): Union Home Minister Amit Shah-i Hokolbarnü Assam nung Legislative Assembly complex tanabuba yanglutsü atema lung azüngtsüogo.

Dibrugarh nung iba complex ya Rs 284-crore project endoka yanglutsü. Iba complex nung Assembly building, MLA hostel ka, 800-capacity auditorium aser 480-capacity barrack adentsü.

Iba sentong nungsa Shah-i Khanikar nung Multi-Disciplinary Sports Complex indang Phase-1 lapoktsü.

Iba facility nung indoor stadium, swimming pool complex, football playground, aser lawn tennis, volleyball, o basketball courts dena lir.

Amit Shah-isa Phase-2 atema lung azüngtsüogo aser iba ya Rs 209-crore expansion atema lir.

"Congress sorkari Assam nung alir nem kecha meinyaktsü. Saka ozü sorkar aruba sülen state renloktsü atema tenangzükba agir inyaker. BJP sorkar iba osang sangoktsü aser tanü Assam nung tanabuba Assembly Complex lung azüngtsüogo" ta Khanikar Playground nung Shah-i ashi.

Paisa National Disaster Mitigation Fund kübok Assam nung Wetland Restoration Model tenzüksüogo.

Iba mapatong atema mezüng Rs 692 crore lemzüksüogo aser

iba kübok major wetlands 15 yanglushir Brahmaputra tzümetsüng tzi indang natural reservoirs akümtsü.

"Onoki flood-free Assam nangzuka liasü aser tanü onoki scientific solution agütsür. Union Home Ministry-i mezügbuba shilem nung wetland developments 15 atema Rs 692 crore lemzüksüogo. Iba ajanga onoki nisung lakh 7.5 kümzüksü aser ali hectares 77,000 tashi irrigation kübok aitdaktsütsü. Iba ajanga asen aluyimertemi küm nung asemben tashi alu yimtettsü" ta Amit Shah-i metetdaktsü.

Tawa India-European Union Free Trade Agreement indang jembidang Home Minister Shah-i "FTA nungi tajanzük tulutiba angubaji Dibrugarh asütsü kechiyong tea gardens nungi süngo adokbaji European Union nung zero tariff agi linük 25 dangi yoktettsü" ta ashi.

Congress party-i vote-bank politics atema ozüng alema aruba ya hadir ka ama beshi. Assam nung terenlok, yimjung, security, industry aser flood-free atema taruba assembly elections nung BJP nem vote enokjang" ta Shah-isa ayongzüker.

"BJP-i kümsük tasenbuba atema sorkar kümra, Bangladeshi nunger Assam nungi agientsü" ta paisa ashi.

DAYO-i ozüng alema inyaksangshiba anendaktsütsü ayongzüker

Dimapur, January 30, 2026 (TYO): Dimapur Ao Youth Organisation (DAYO)-i prangpong amer Commissioner of Police Aotula T. Imchen, IPS lenisüba kübok Dimapur Police Commissionerate ajanga law and order maparen akangkanga inyakba aser mapang shitak nung Aoyimkum yimsüng tatalokba den sendaktepa alirtem apuba atema tenügsang agütsüogo.

DAYO-isa Nagaland DGP Shri Rupin Sharma, IPS lenisüba atema tenügsang agütsüba den pai bendanga agüja inyakba aser

mapa tamajung inyaksangertem anema mapa tajungtem tenzüker atema pelaba metetdaktsüogo.

Ozüng nung aliba ama temeten agütsütsüla aser kasa mapang lokti nung shingaia ozüng mapa meinyaktsüla ta DAYO-isa ashi.

Kümtem süia arudang prangpong abenertem aser ozüng alema inyakerteri kanga bulua inyaksangshiba aruba atema tebilemstü tulu abener. Item maparen ajanga public lendongi idaktsür aser tensa raksatsür. Anungji kin ajaki ibala mapa

tamajung anema külemini longjemer noktaksü ayongzüker ta DAYO-isa metetdaktsü.

Lateta aliba ozüng alema kija mesüra telok shingaia inyaksü makok aser shia metetertem aliba loktiliba ka nung ozüng alema inyaksangshiba, tashiyim agi sen meshiba aser amokmerenba inyakyim magizüktsü. Anungji tebilemstü abenba sensotem, civil society organizations aser lokti lennirtem kümküma alitsü aser ozügi melaba ama maparen inyakba pusema nungittsü ayongzüker ta DAYO-isa ashi.

NSF-i Naga yimten tebilemstü atema kümdanga jembitsü ayonger

Dimapur, January 30, 2026 (TYO): Kija aser teloktemi Naga yimten tebilemstü atema o mashie jembiba aser tai tongloktsüba atema tebilemstü abener ta Naga Students' Federation (NSF)-i metetdaktsüogo.

Nübertemi Naga yimten tekaratiba nung latetdaktsünüba angateter saka tai tongloktsütepba aser aitsüba ajanga tensa tamajungba akümtsü akok ta NSF-i ashi.

Naga nungeri tang ya telongjem nüngdaker aser asenok sasep nung telemsa adokba ajanga külem ken o atema bendanga agüja inyaka aruba nung tetsükdaktsü ajurutsü akok ta parnokisa ashi.

Naga yimten tebilemstü ya Nagaland kisüng nung dang masü saka artificial arrtsü adena orr aliba Naga nunger ajak densema lir. Tesüba tenangzükbatem ajanga tamakok angu kechiyong tongtipang onüktem asaa züngdok aser iba ajanga temulung melemtep adok aser yimjung maparen nung tetsükdaktsü ajurua liasü ta NSF-isa ashi.

"Nisungtem rongnung tangatetba balala lir saka asenoki tesem, telok mesüra tanga wadang nung ajemdaker telemsa adoktsüsa mapa meinyaktsüla kechiyong Naga yimten tebilemstü ka dang lir aser telemtetbajia Naga nunger ajak atema ka dang asütsüla" ta NSF-isa ashi.

September 12, 2024 nü

Nagaland sorkari consultative meeting ayonga amendang sendaktepa alir ajaki India sorkar dang yimjung maparen ya tematiba political level nung ajungkettsü mepishitsü bangiemtepogo ta NSF-isa ashi.

"Anungji state sorkari iba bangzüng atema koba tashi inyaka arudar metetnür aser iba lemtet nung ajemdaker inyaksüla kechiyong iba ya sendaktepa alir ajaki mulunga agiba lemtet ka lir. Külen, India sorkaria nendaka aser mulungteta mapa inyaksüla aser Naga yimten teloktem külemini longjemtsüla, kati ka akhümtsübuttsüla aser teti atema lemtet tajung ka agitsü atema inyaksüla" ta Media Cell, NSF sangdong ka metetdaktsüogo.

BAN mezüngbuba monthly fellowship agiogo



Dimapur, Aenjeti/January 30 (TYO): Business Association of Naga (BAN) küm tenzüka mezüngbuba fellowship sentong January 30, 2026 nü Dimapur nung agia liasü.

Shishilempaba nung Tsüngrem mezüng südaksütsü aser züngsemtem Tsüngrem nungi shisatsü meshia iba sentong ya ayongzük.

BAN executive member Alobo Naga-i anir tekülem aser tetushi mapang agia sentong tenzük, aser The Warehouse

Church indang pastor Jack Pucho-i sentong ani aser paisa Tsüngrem o jembia liasü.

Iba mapang pai BAN züngsemtem dang tamang, shisatsü aser ochi nung ajemdaker pei enterprises yangertsü ayongzük.

Iba sülen kija aser arok sarasadem onüktem benden, kong züngsem temi pei tebilemba aser shishilempaba tsütsü tebilemtsü aser tarutsü atema teimla lemsatepa liasü.

BAN lenirtemi iba lokti

inyakyim aser nükjidong lemsatepa liasü.

Ita shia iba ama fellowship ayongzüka BAN-i entrepreneurs rongnung tanüla tashi itdaksütsü, yimya tajung amshia shishilempatsü kati ka dak tamang katepa aser arok mangdang asoshi yariteptsü nükjidong lir.

BAN Monthly Business Fellowship mezüngbuba aliba mapang business ya mission ka ama ajaki inyaksü mulungtepa liasü.

Mokokchung nung PM-NAPS awareness drive ayongzük

Dimapur, Aenjeti/January 30 (TYO): Pradhan Mantri National Apprenticeship Promotion Scheme (PM-NAPS) atema awareness aser registration drive ka Jubilee Memorial College, Mokokchung nung Brishotibarnü ayongzüka liasü.

Iba sentong ya Ministry of Skill Development and Entrepreneurship (MSDE) kübok ayongzük, koba Ato Kilonser indang mangdang "Ashta Lakshmi" aser "Viksit Bharat, Viksit North East" den lirumedema Northeast Region nung ranglokba sentong ka lir.

Iba scheme ya industry demand aser skilled talent

tsüngta apu latsür ama lir.

Atsunga Walling, Additional Deputy Commissioner, Mokokchung ajanga iba sentong nung jembidang skill development nüngdaka akumba indang lemsatepa liasü.

"Traditional degree kisüing ya teperi masü kumogo," ta Walling-i ashi aser lanurtem dang theory shisatsü aser mapa kuma inyakba tsüngta apu alatsü ayongzüka liasü.

Skills ya sorkar mapa bushiba nung kisüing masü saka self-employment nunga tongtipang lir ta pai ashi.

H Alongse, Joint Director, DOESDE ajanga Nagaland nung employment tensa indang

lemsatepa liasü aser Indian Institute of Entrepreneurship (IIE), Guwahati nungi ketdangsur temia region nung apprenticeship tejakleni aotsü asoshi lemangtem lemsatepa liasü.

Sentong nung onir Dr. Chubaienla Imchen (Asst. Professor, JMC) liasü aser Sector Skill Councils (SSCs) aser Third-Party Aggregators (TPAs) den interactive networking session agia liasü.

Iba sentong nung T Imlisunep Ao, Principal, Govt. ITI Mokokchung ajanga pela agizükba o jembi aser Enchiba Longkumer, Principal, Govt. ITI Kohima ajanga melepzüng o jembia sentong tembang.

Mokokchung nung National Anti-Leprosy Day amung



Mokokchung nung January 30, 2026 nü National Anti-Leprosy Day amungdang shilem agirtemi tezüngzüktep agiba noksa nung angur.

Dimapur, Aenjeti/January 30 (TYO): Mokokchung nung January 30, 2026 nü CMO Conference Hall nung "Ending discrimination, Ensuring Dignity" omen kübok Anti-Leprosy Day aser Sparsh Leprosy Awareness Campaign ayongzüka liasü.

Dr. R. Toshimenla Jamir DPO CD II ajanga sentong nung jembidang leprosy ya

alima nung tashidak tejentiba lir aser leprosy indang awareness agütsütsü atema Anti-Leprosy Day ya linük tesem ajunga nung amunger ta ashik.

Leprosy ya anepaluteter, taneptsü angur, anungji mesümekena bilemba aser bendanga amshiba anentsüla, ta lai ashi.

EAC Mokokchung Vitulu, NCS ajanga leprosy adokba,

yimya aser timtemba temaitsü indang rateta ashi aser health care workers aser NLEP staff tem dang tali saksalemtsü aser nüburttem den tali teka amteper 2027 tashinung leprosy samadaksütsü merangtsü ayongzüka liasü.

Iba sentong nung shilem agirtemi National Anti-Leprosy Day 2026 nung tezüngzüktep agia liasü.

Governor's Award sentong February 2 nü agitsü

Dimapur, Aenjeti/January 30 (TYO): Arts, Music & Literature nung dangar dak nungi alakteta inyaktetba atema Governor's Award 2025 takok angur nem tetushi agütsüba sentong ka February 2, 2026 anüngdang 11:00 ako nungi tenzüka Dr. Imkongliba Hall, Lok Bhavan, Kohima nung agitsü, ta sangdong ka ajanga ashi.

Kidimayimtsüng nung PwDs atema sentong ayongzük

Dimapur, Aenjeti/January 30 (TYO): Nagaland State Rural Livelihoods Mission, Block Mission Management Unit RD Block Jakhama ajanga Office of State Commissioner for PwDs and Department of Health & Family Welfare den lungjemer January 29, 2026 nü Kidima village, Kohima nung Persons with Disabilities (PwD) Self-Help Groups (SHG) atema sentong ka ayongzüka liasü.

Iba sentong nung "Art of Giving Project" kübok PwD SHG züngsem nem wheelchair lema agütsü, kong Assistant Superintendent of SCPD, Salie Koza-ia teyari agüja liasü.

Program Coordinator SCPD, Ashe H. Kiba-i accessibility aser inclusivity of PwDs indang jembi aser PwDs dang pei sapang amshia lokti nung temelenshi adokdaksütsü ajungshia liasü.

Huvostolu Lohe ANM, Health & Wellness Centre, Kidima ajanga PwDs pur temang anema alitsü indang lemsatep aser iba sülen wheelchair lema agütsü aser special health camp ka ayongzüka PwDs nem healthcare service agüja liasü.

Iba sentong asoshi Kidima nung aliba Village Level Organisation ajanga yimtsüng nungi PwDs pur anidenba nung yaritepa liasü.

Dimapur nung mejangjaba nisung tasü mang ka nguteta lir



Dimapur, Aenjeti/January 30 (TYO): Arishi küm 30-40 tsüngta mejangjaba nisung (tebur, local) tasü mang ka Khatkhathi end tsütsü KM 261/5 nung nguteta lir ta Station Manager NF Railway Dimapur nungi tezüluba nung osang ka January 29, 2026 nikongdang 5:41 ako meta arua liasü, ta Dimapur Police ajanga sangdong ka nung ashi.

Osang anguba sülen duty nung alirtem iba tesemi oa tasü mang ya reprangdanga train agi tsükset südi ta temulung melemteni lir, ta ashi.

Ozüng agi melaba maparen

ajak tembangba sülen tasü mang ya PM examination/identification atema District Hospital Dimapur Morgue nung bener oa lir.

Nisungba ya T-shirt aut sentsü den jacket sentsü tanak aser long pant sentsü tanak aser boxer temtangbusa ka semer liasü.

Kibur/kinunger/tembar temi Officer-in-Charge, Govt. Railway Police Station (GRPS), Dimapur den Mobile No. 7085055021 nung tongteprateptsü mepishir, ta Dimapur Police sangdong ajanga ashi.

IDAN-i Intellectual Property Rights awareness sentong ayongzük

Dimapur, Aenjeti/January 30 (TYO): Investment and Development Authority of Nagaland (IDAN) indang Intellectual Property Facilitation Centre (IPFC) ajanga Ministry of MSME den lungjemer Intellectual Property Rights (IPR) indang awareness sentong ka Innovation and Incubation Centre, IDAN, Kohima nung Hokulbarnü ayongzüka liasü.

Sentong tenzüka Anini Nyenga, senior consultant, IDAN ajanga state nung entrepreneurship kanga kera züina aoba aser renlokba indang lemsatepa liasü.

Anini Nyenga-i sentong nung adenertem dang pei business aintsü aser wazüka ayutsü atema iba sapang amshitsü ajungshia

liasü.

Shisalen sayur Zabenthung Khuvung, IPFC project associate, IDAN ajanga 'Intellectual Property Rights and its components' onük nung jembi aser Imnasenla Jamir, IPFC legal consultant ajanga 'Infringement and opposition' onük nung jembi liasü.

Iba sentong nung entrepreneurs, startups aser entrepreneurs kummer tem aden aser parnok nem Ministry of MSME kübok IDAN-i yaria Intellectual Property Rights (IPR) tabu ajunga atema registration services agütsüba indang angatetdakja liasü.

Sentong tembanga Meshu, IPFC Coordinator, IDAN ajanga melepzüng o jembi.



Kathmandu, January 30, 2026: Hokolbarnü nü India-i Nepal nem SUVs aser pick-up gari 250 agütsüba sentong nung Kathmandu nung aliba Indian Embassy nung ketdangser, Rakesh Pandey aser Nepal Finance Minister Rameshwar Prasad Khanal na den ketdangsertem tangokba noksa nung angur.

SC-i state/UTs dang school nung 'sanitary pads' agütsütsü tuyu

New Delhi, January 30 (Agencies): Hokolbarnü Supreme Court-i 'menstrual health' temeden dak sendakba nung states aser Union Territories ajak dang school tem nung tetsürtem nem oxo-biodegradable sanitary pads angati agüjang, aser tetsür-tebur bendanga metsümeshidak agüjang, ta tetuyuba agütsü.

Atsüapong ajak kasa züngshiba aser shisaliok agütsüba nung ajak kasa züngshiba dak sendakba nung Justices- J B Pardiwala aser R Mahadevan nati akümba bench-i, sorkar school süaka private school süaka school ajak nung tetsür nem sanitary pads angati agütsütsüla aser tetsür o tebur na bendanga metsümeshidak temeja agütsütsüla, ta metetdaksü.

Justice Pardiwala-i, state aser union territories-i tuyuba amaji shidak meinyakra sorkartem anema tasüngdangba alitsü aser nija school tem nungi recognition agentsü, ta metetdaksü.

"India temzüng nung Arrla 21 kübok taküm alitsü temeden nung menstrual health temeden densema lir," ta pai metetdaksü.

Court-isa, "Sanitary pads ji metsümeshidak anasa 'vending machines' ajanga tetsür nem agütsütsüla, mesüra school temeket nung tesem ka nung agütsütsüla," ta metetdaksü.

School nung metsümeshidak junga maliba dak sendakba nung court-i states aser union territories ajak dang, "Atsüapong (tetsür-tebur) bendanga metsümeshidak agütsütsüla aser metsümeshidak tzü mesüoka alitsüla," ta metetdaksü.

"School ajak nung metsümeshidak teka metsütsü atema mapang ajak nung sapon aser tzü alitsüla," ta court-i metetdaksü.

Justice Pardiwala-i, "Right to Education (RTE) ya taküm alitsü temeden aser meimchir akhümket shilem ka lir," ta metetdaksü.

Court-isa, Arrla 21A kübok

shisaliok temeden aser RTE Act metetdakja ajak nem shisaliok tajung agütsütsü metetdaksüba den külemi school tem dang RTE Act kübok Arrla 19 nung lateta alibatem shidak inyaksüla, ta metetdaksü.

"Ano sorkar school mesüra sorkari achaayangba school temi RTE Act nung aliba ama meinyakra item school tem 'derecognise' asütsü," ta bench-i metetdaksü.

Court-isa states aser UTs ajak dang school temeket ajak nung 'menstrual hygiene management corners' alitsüla aser menstrual health den tainlonglong dak sendakba awareness aser training agütsütsü tuyu.

2024 küm December 10 nü Jaya Thakur-i India tesem ajaklen 'Menstrual Hygiene Policy for school-going girls' benoktsü atema Supreme Court nem temepishiba ken o agüja liasü, aser iba ken o angadangba sülen court-i item tetuyuba agütsü.

Ajit Pawar-i NCP telok ana loktepnüa liasü

New Delhi, January 30 (Agencies): Nationalist Congress Party (NCP) telok ana tanaben lokteptsü atema Maharashtra Deputy Chief Minister, Ajit Pawar-i teinyakdak liasü aser iba maparen tembangtsü mapang ana nung lia pa tayimtsü lendong nung süadok, ta pa den külemi inyaksemer kati ashi.

1980s mapang nungi Ajit Pawar den külemi inyaker, Kiran Gujar-i, taoba hopta ang Pawar-i NCP telok lokteptsü atema metetdakja liasü, ta metetdaksü.

Bodhbarnü Baramati nung Pawar den nisung pezü tayimtsü tsükokba lendong nung asü.

Gujar-i, "Telok ana lokteptsü atema pa inyaka liasü. Anogo pongu tejaklen ang pai, iba maparen tatembanglen kati arudar aser taruba anogo ishika tsüngda lokteptsü ta kü nem metetdakja liasü," ta metetdaksü.

Tawa civic elections mapang nunga NCP telok ana longjemer toktepa liasü. Iba mapang nungji osangbener kar den jembidang Ajit

Pawar-i, pai NCP (Sharad Pawar telok) den loktepnar aser tebu tanubo Sharad Pawar temang junga lir, ta metetdakja liasü.

January 15 nü Pune aser Pimpri Chinchwad civic election nung NCP telok anati longjemer toktepa liasü, iba sülen taruba ita agitsü aliba Zilla Parishad elections nunga longjemer tokteptsü bangjema liasü.

Gujar-isa, Ajit Pawar-i telok ana lokteptsü atema dang masü saka telok ana atema sentonga renemer liasü, ta metetdaksü.

"Telok ana lokteptsü atema Sharad Pawar, Supriya Tai (Supriya Sule) aser tangartem den tejembidak liasü," ta paisa metetdaksü.

"Telemtetba tajung aika agia liasü, ajisüaka tia makai lendong ajurua Ajit süadokogo. Pa süadokogo saka Baramati aser state ajungtsü atema telok anati longjemer inyaksü," ta Gujar-isa

metetdaksü.

Gujar-i, "Ajit Pawar-i 1981 küm Chhatrapati Cooperative Sugar Mill nung takok anguba sülen yimtenren nung ajemoktsü jangra. Mezüngbo pai par kibong aser aluyimba nung ang rangloknüa liasü. Ajisüaka 1980s mapang Pawar saheb (Sharad Pawar) chief minister akümba sülen Baramati nunga lanur lenir ka nüngdaka liasü, aser ibaji odila (Ajit Pawar)-i ataloktsü," ta metetdaksü.

"Baramati nung terenlok maneni alitsü, ajisüaka Ajit ama lenirbo matoktsü," ta pai ashi.

SIR mapang Form 7 tim mesüi amshir: Congress

New Delhi, January 30 (Agencies): Ita pezü tejaklen Congress-i Karnataka kübok Aland constituency nung votes aika agienba metetdaksüba sülen maneni Congress-i Election Commission dang, SIR mapang nung tesem aika nung votes agentsü meranger, ta metetdaksü.

Congress general secretary (organisation) K.C. Venugopal-i shidi ka ajanga, "Media osangtem aser party nung inyaktermi nisung kar aser BJP züngsemtemi Election Commission indang document, Form 7 amshia tim masüba nung final electoral nungi voters agienogo ta sangdongba ya shisabulutsüsa lir, anungji Election

Commission tang rongdak süa inyaksüla," ta metetdaksü. "Item inyakyimji mita mereprangra aser C o m m i s s i o n - i memetongshitsüra ibaji ajanga election nung tajangzüik angutsü atema BJP tasü itdaksütsü aser voters aika voters list nungi agentsü," ta pai metetdaksü.

Venugopal-isa tang SIR tagidak states- Gujarat, Madhya Pradesh, Chhattisgarh, Uttar Pradesh, Bengal, Kerala aser Assam nung item ama tatalokba osang aliba metetdaksü.

Gujarat aser Rajasthan nunga Congress units-i election ketdangsertem nem item tashishiba metetdaksüogo.

Ato kilonser Modi aser Tir Murmu nati Gandhi nem akhüm agütsü



New Delhi, January 30, 2026: Mahatma Gandhi asüba anogomong nung Ato kilonser, Narendra Modi-i Rajghat semdanga asür nem akhüm agütsüba noksa nung angur.

New Delhi, Aenjeti/January 30 (Agencies): Mahatma Gandhi sür küm 78 ajungba anogomong nung Ato kilonser Narendra Modi-i Raj Ghat semdanga asür nem akhüm agütsü.

Hokolbarnep Modi-i X ajanga, "Linük tebuti Mahatma Gandhi asüba anogomong nung ni pa nem akhüm tulu agütsür. Babu-i Swadeshi atema tajemdakdak yanglutsü, aser iba tongshi nungji ajemdaker asenoki tangar dak memetaloki aliba India ka yangertsü melungteter inyaker. Pai inyakba mapatem ajanga linük nung nüburtem maneni ajungmesotsü," ta metetdaksü.

Ano külen Tir, Droupadi Murmu-ia Rajghat semdanga Mahatma Gandhi nem akhüm

agütsü.

Mohandas Karamchand Gandhi leniba nung linük nüchiso atema raraa liasü. Küm 78 tejaklen January 30 nü pa sarasademi aoba mapang nung Nathuram Godse-i pa khaset.

Iba anogomong nung Sarva-Dharma-Prarthana aser Martyr's Day sentong nung Defence Minister Rajnath Singh, Minister of State Defence Sanjay Seth aser Union Minister Manohar Lal Khattar nungera liasü.

Küm shia Ato kilonser Modi-i Rajghat semdanga naro yutsür Mahatma Gandhi nem akhüm agütsür. Hokolbarnü Congress lenir Rahul Gandhi densema party balala nungi lenirtemia linük tebuti, Mahatma Gandhi nem akhüm agütsüogo.

 बैंक ऑफ़ बड़ोदा Bank of Baroda			HIGH SCHOOL JUNCTION BRANCH High School Junction, Vizo Commercial Centre, Kohima, Nagaland- 797001, Email: vjhigh@bankofbaroda.bank.in			ABRIDGED VEHICLE E-AUCTION NOTICE	
Public aser talisa sen apur (tem) aser Guarantor (tem) dang ya sangdonger, Hypothecation/Loan Agreement kübok agüja aliba tashi nung ajemdaker Bank-i tsünglanglen shia aliba Hypothecated Motor Vehicle agiadokogo aser gariji "Kong lidir yamaji", "Kong koma ali" aser "Yangji aliba ajak" basis nung ayoktsü, aser ibaji tsünglanglen aliba account/s nungi sentsüh alangzüksü atema lir. Sen apur/tem / Guarantor/tem / Gari /Sentsüh / Reserve Price / e-Auction anogo aser mapang, EMD aser Bid Increase Amount osang tejangja tsünglanglen shia lir:-							
Sr No.	Name & address of the Borrower	Total Dues (in Lakhs)	Vehicle Make & Model Registration No.	Date & Time of e-Auction	1. Reserve Price 2. Earnest Money Deposit (EMD) 3. Bid Increase Amount	EMD deposit Account No. & IFSC Code Name of the Branch	Inspection Date & Time
1.	Z HOKALI AYE KOHIMA	3.85	Make: HYUNDAI MOTORS INDIA Model: SANTRO 1.1 MT SPORTZ Regd. No.: NL01CA4977	06.03.2026 Time: 12 pm to 4 pm	1. Rs. 1,95,000/- 2. Rs. 19,500/- 3. Rs. 10,000/-	A/c No.: 65550015181219 IFSC: BARB0VJHIGH	02.03.2025 Time: 10 am to 4 pm
Iba dak sendakba nung telatetbatem tejangja metettsü atema website link https://baanknet.com nung reprangang. Bid asütsüpurtemi Branch Head den Mobile No.: 6009026349 ajanga tongteprateptsü akok. * Bank inyakyim dak apet GST alitsü. Date: 30.01.2026, Place: Kohima							
						Authorised Officer, Bank of Baroda	



TIR YIMYIM YIMOBILEM (EDITORIAL)

DIMAPUR

KÜPTOKNÜ

AENJETI 31, 2026

Naga nunger ya kong atemtsü ?

Naga nunger asoshi Nagaland-bo mesemteta ayu saka yangjia Naga nunger ajak mayimbanget, anungji Naga nunger ajak ayimbanga Naga lima ka yanglutsü asoshi bangjem, saka ajia mapa kuma meinyaktet. Ano taküm tenla dena agüja Naga yimten nüchiso yimli ka asoshi India den rara saka yangjia takok mangu, anungji rara anener yimjung nung Naga yimten ken o jembitsü asoshi Naga yimten nüchiso bushir telok kati India den 1997 küm yimjung yanglu aser kasa teloki Naga yimten yimli ka kümtettsü asoshi 2015 küm India yimten densa tangatettep ken o ka yanglu. Ano, kasa tangatetba nung Naga yimten nüchiso bushiba telok katia 2001 küm India den yimjung yanglu aser iba sülen kasa telokisa Naga yimten tebilemtsü tatembang kuma latettsü asoshi yimten onük kar India den 2017 küm mulungtepa agizüka ayu. Ajisüaka, Naga yimten tebilemtsü ken o tatembang kuma latettsü asoshi Naga nunger yimten nüchiso bushir teloktem o India government na tsüngda alimai meteta lemtetba onüktemji tanü tashi kata mapa mekümi yua lir. Aji oda, Naga yimten yimlibo melatet, saka Naga yimten nüchiso bushirtembo India government-i mekazüksüba tesem Designated Camps nung tepuoker kuma aliba mapang, telok ana agi pezü, pezü agi ti aser ti agi 16 ta, tangbo Naga yimten ken o tatem kuma melatettet aliba mapang khen alitsü atema mekazüksüba tesem nungji lia lia, Naga yimten ken o tatem kuma renema jembitsü melen asenok rongnung telemsa aser meputepang tali adoka Naga yimten nüchiso bushir telok ya kwiar asenokia meshitet ka kümogo. Aji oda, asenok asoshi temamangtsü aser shisabolutsü tulutibaji, koba telok aser shibaiang Naga nungertem ajaki agizüktettsüsa Naga yimten telemtetba ka bener arutettsü (?) ta asüba tasüngdangba tensa tia ya asütsü. Iba ama kodamasüba mapang nung, yakanü Nagaland nung yimtsü-yimbotem Dr.S.C.Jamiri anir Naga yimten latettsü asoshi telok ajaki mulungsua ken o lemtetdaki arutsüla ta ashibaji, atangji, atar matatet shisabolu marem ashiba ken o ka asütsü. Atangji, item yimtsü-yimbotem dakjia tamangtsü tulukabo mali, kechiyong parnokji mapang ka mesüra ka nungbo yimten yimsüsüba aser ketdangsüba menden nung mendangertem lir. Item kasa yimtsü-yimbotem jagi mapang kabo menua melii ita ishika tsüngda Naga yimten tebilemtsü ya latettsütsü ama jembibaa angashiogo. Aji oda, India temzüng nung azüngashia India linük aser temzüng kümzüka ayutsü asoshi yimsüsür aser ketdangser akümba purtem asoshi tanü Naga yimten ken o jembitsüba ya sademrabo masü, anungji parnoki kanga süoki ia jembiyonga, ashiko, nübortemi kanga mulunglemtetabo magizüktettsüsa akok. Ajisüaka, parnok indang otsü aser jakla yimyaji toktsür, parnoki kechi ashir ta asübaji angadangra, atangji, parnoki ashiba nungji Naga yimten tebilemtsü tatem kuma latettsüba nung yaritsüsa shisa tajunga lir. Itemji bilemdanga, Naga nunger nüchiso bushirtem shirnoksa India government den Naga yimten ken o tejembidak lir, parnokji Naga yimten ken o jembiba tesemi külemi arutettsüsa Naga kintem shia nungi ajendanger tapet nisung shimteta inyaksü asoshi bilemdangtsüla. Ibaji dang masü saka Naga yimten nüchiso bushir teloktem nungia, telok nüngtet balaka süaka, tangateter kari telok ajak ajuruteptettsüsa tila kümer tongtepratep tenzüksüla. Tangbo Naga yimten tebilemtsü latettsüba ya India ket nung masü saka Naga nunger ket nung lir, anungji Naga nunger kenbang-obang medemer India dang shitetra, ibaji India-i magizükiang malitsü. Atangji, Naga yimten latettsüba lenmang yangluba nung FNR telokisa shilem tuluba agia Naga nunger rongnung azü tokshitepba anendaktsüogo aser putepdaktsütetogo. Joko, Naga yimten ken o latettsüba yabo parnok daksa imlaa melii Naga nunger kin shia nungi lenirtemia tetsübu aser shisabulu ajak tizükteta Naga yimten khuret benloktsüla. Iba jagi dang Naga yimten asoshi tagitsü ola ka adoktettsü.

OLEMSABANG

Tia Melenshitsür

R. Talimoa

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

Khen mapang jila tuluka nung aiür asangur Kongro Temjenla aser Sangbang Takaba tena kanga dang meimtepa liasü. Tia kar maka tena kibongmekümjungi Temjenla mashisa aküm. Iba osangji Takabai atentena par tsürabur dang ashi. Tia majung Temjenla ya amitsür jala kibong tepetzük nungi asünung Sb. Takaba tsüraburi khenyongi memelungi kanga ain adok. Tebui Takaba dang ashi "Kr. Temjenlai benaalibatanur ya ner chirmasütsüaser küsemchirrongnungamadentsü, iba Onai mangarana dena kü sen mang nung medendaktsütsü" ta tebui akangakanga ozüng agütsü. Kechiyong Takabatsüraburji takar liasü. Sb.Takaba ya tesüngjem,ajemalu aser tsürabur akhüm tsübuba asangur ka liasü. Pai meimla dangi oa aser ashi 'ana alitsü kü tsüraburi memelunger,anungji ana melitettsü, koba ana chir nai bena lir tanur ya ozü chir mekümtettsü' tashiroadok. Temiemtsü Temjenla mulung zürep tulu agi kongshia kanga ajeb aser lai tetsü dang tatalokba otsü ajak ashi. Iba O ya angashia aoksaa temeimtetsüsüadok. Matongalidak leptok amai Temjenla asoshi shisaramaa khuret tulu agi mekütbang. Saka lai bena aliba tanurji lai kanga meim nungji lai tanurji kodang asotsü kanga yongyaseta liasü. Mapang tatsüka süir kelen, tanur tebur chanu ka aso. Anungji tanur tenüng ajatsü asoshi Takaba tsürabur dangi oa tanur tebur chanu ka soa lir anungji, Jabaso nem tenüng agütsütsü asüngdanga mepishi. Idangji Takabatebui meit adoka ashi "Koba tanur nai soa lir iba tanur ya ozü semchir masütsü ta ni shiatokogo anungji, ni tenüng magütsütsü shiruru tenüng ka jang" ta langzü. La khuret lemsatepdak shinga mali ammannung milenremsep ama tammang tia tulu agi la mekütbang. Saka la mulung süngzü kaji, la tepi ma nung tanur tebur chanu ka mena aliba yong la mulung olushi aser tanur ya kenübo nisung rongnung züngsemdaktsütsü ta lai azüngashi. Temjenlai la telidak jila ya toktsütsü lemtet. Lai jila danga ka bushia ao yangji la aahyanga tanur metsütsü lenmang bushi. Tsüngremi tena nem tia tajung ka meküplokja, kenü anogo takar kibong ka nung par atsü mapa inyaka alitsü maongka angu. La kanga pelaseta iba atsü tezülen tena ki tila ka nung lia mapa meranga inyaksü tenzü. Kenü nikongtsütsü kibur kinungsü tena Temjenlar kidangi arua otsü adong. Temjenla aser tanur tena otsü tatalokba ajak ashitsü tenzü. Iba O angashia kibur mulung kanga raksa aser kibur sang jagi tanubosangji ajunger aru, aser "Ne tenüng tanü nungi Sb.Tiajungba ajatsü ni tenüng agütsür. Na kü semchir asütsü, ni na tashi temeteter kümdaktsütsü". Kechiyong par kibur ya tanur maliba kibong ka liasü anungji tenati tena semchir ama anepalua kakat Riju tajungnung züngdaktsü. Tiajungba ya tesangra ajemalu sempet tajung keta aliba tanur ka intet. Pai kibong tia metetba den tetsü khuret abenba asangur ka akum. Pai mapa kanga meranga inyakba den kanga nentaka kakat azüngnungkenüpaDoctoraküm. Palanuwa mapangtetsüSarasademnükztüagi mesütet. Palanuwa amungnü Riju nung Tsüngrem temiem angatet pai kechi sentong yangludir,Tsüngremtama südaktsü. Doctor Tiabai sentongyangluba ajaknung Tsüngremi apular aniteter ama ajungkettsü. Ashiba ama, pai aginüa aliba pa aliba jila nung mozü ki tajung ka nung Doctor mapa inyaksü maongka angu. Tetsü tena nüngdak ajak peria bendena pelatepa ali. Kenü nikongtsütsü Doctor Tiajungbai tetsü dangi arua tatalokba ka lemsatep. "Oja, tanü temiemtsü tambur ka kinunger teyariteper shinga mali aser patemangji kanga mejungi Operation magi nungbo kecha lenmang maliasü, anungji koda masü tia ka ajurua ni kü rongsen agi Operation takok ngua agir yokogo". Tetsüi langza ashi "Jabaso nai mapa tajung inyakogo rongsen ya tanü lir asüng malitsü saka mapa tajung inyaktetba yabo kodanga mesamatsü. KenüTsüngremi mapa tajung inyakogo ta ashitsü maongka alangzüktetba asoshi na pela liang". Mapang tatsü kasüiaor külen,künep tambosang Doctorbaki bushia aruaserkishi nung akoshi. Doctorba kishi lapoka alu nung pai yariba tambosang to pa ket nung akaba tebu senmang azük ka bener arua Doctorba nemagutsü, "Doctorba nai ni kümzü kung ni kebu senmang ya nünemagütsür" ta shiaagütsü.DoctorTiabai tambosang tekaameter"Oja,Oja,"tajakilungi anirai aser tetsüdang "Oja ni yariba tambosangtoya" ta ashi. Idangji tetsü aoksar pai amaaaliba oset ali nung tsükdaktsü. Idangji ano tambosang jia ali nung menadok. Aji ngua Doctorba kanga aoksaa "Ya kechi asü" ta ayimten. Idangji tetsüi "Tiaba nai yarisang Tambur ya nebu lir" talangzü. Tesüngmangtsü ola angashia Doctorba kanga aoksa ajeb. Idangji Tambosangi "Ni tashi mait taküm kü dang tai tokang, tai tokang," ta ayimtena ajeb. Aji angashia Doctor Tiabai "Tai tokogo anenang ni kebu anguba atema kanga pelar. Arung, Tsüngrem tenüng sangdi Tsüngremer tesüngmangtsü sentong asenok nem bener arutsügo". Kechiyong tetsüi tebu tena atalokba tanur dang ajakbo mashi saka tebui tena toktsür aoba dang shir liasü. "Oja, tanübo ni mapai maotsü asenok tajungtiba chiyungsü renemang". Tetsüi Takaba tebu dang asüngdang, "Koda ner tsürabur aser kinunger ajak junga lir südi?" Takabai langzü "Ajak tembangogo, kenui sentsüh bener aruba agi ozü rongsen ajak amajok nung tematokogo. Onok talidak maka yimti tezülen aremnunglia tsüraburi anir kenu nunger ajak süadoker ni kisüng anung. Anonia tasütsüba agi meneper lia Doctorbai kü takum kümzü kogo". Idangji Doctor Tiajungbai "Arung, süia aoba mapatem aser anogotem yutsüdi ajakji Tsüngremer mopungsem agi bener oadokogo. Ajiang, asenok asoshi tepelatsü taochi mopungsem tasen ka bener aruja kar. Iba asoshi asenoki Tsüngrem tenüng sangdi. Arung, "Oja, kebu nena teka amtepang, tanü asenok asoshi kibong tasen soshiba anogo ka bener arutsügo". Yamaji par kibong tanabensoshia tepelanung liaao. Tatemnung, "Shiri kaaita alidang pei sasa inyaktet ama aser pei sasa olu ama bilema alir, kenü parnok leptoktsü. Taküm lenmang kechi tia ajurudir ajuruaka, pei sasa aremzüka khuret bentettertemi moa. Anungji, kenü aseni inyaktetba yari Tsüngremi asen nem senpettsütsü"

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jesuit putir Thomas V. Kunnunkal alima nungi pilaogo



Thomas V. Kunnunkal

January 30, 2026: New Delhi nung Khristantem, taoba mapang kaketshirtem aser Khristan lenirtemi Jesuit putir, Thomas V. Kunnunkal asüba atema mangyimer; pa arrshi küm 99 liasü.

Jesuit putir Thomas-i India nunger shisaliokk nung kanga tongtibang shilem agiba den külemi sensakertem tenzüka aruogo.

Thomas Kunnunkal ya Padma Shri award angur ka lir. Pa arrshi küm 99 lia January 28 nü New Delhi nung asü.

Pa St. Xavier's School, Civil Lines anasa Jesuit residence nung lia asü. Tamalen pa iba school nung principal inyaka liasü.

Taoba mapang Ato kilonser, Rajiv Gandhi yimsüsüba mapang nung Khristan putir Kunnunkal ya Central Board of Secondary Education (CBSE) nunga 1980 küm nungi 1987 küm tashi chairman inyaka liasü. Pa CBSE nung chairman inyakba mapang nung school

shisaliok kanga junga aküm.

Pa St. Xavier's School, Delhi nung kümsük anaben tashi principal inyaka liasü. Mezüng 1962 nungi 1974 küm tashi aser 1977 nungi 1979 küm tashi principal inyak.

Pai India nunger shisaliok nung tongtibang shilem agiba ajanga 1974 küm India sorkari pa nem Padma Shri award agüja liasü.

1989 küm November ita nung India's National Policy on Education kübok National Open School lapokba nunga pai tongti shilem agia liasü.

Jesuit provincial of South Asia nungi Jerome Stanislaus D'Souza-i, Kunnunkal asüba ya takoksa tulu; pai Jesuit dang masü saka nüburtem ajak tenzüka liasü, ta metetdaksü.

D'Souza-i, "Pa ya sensakertem, school züngtur anenertem aser shisaliok nung temelung magütsürtem atema teküzmüker ka ama liasü," ta metetdaksü.

Indian Social Institute nung

pa den külemi inyaksemer Joaquim Anthony Albuquerque-i, "Shisaliok sector nung pa ya tongti ka liasü, ajisüaka pa dak ajemalu shisatsü liasü aser mapang ajak nung staff tem yaritsü melunga liasü," ta metetdaksü.

Kunnunkal ya 1926 küm July 3 nü Kerala state kübok Alappuzha district nung aso aser 1945 küm June 20 nü Society of Jesus nung aden aser 1958 küm June 18 nü West Baden, United States nung 'ordain' süa liasü.

Pa United States nung English nung master's degree angu aser Jesuit Education Association of India nung Tir aser general secretary mapang talangka inyak.

2005 küm pai züluba kaket 'The Role of Teachers in National Regeneration' sayaa. Iba kaket nung, loktiliba nung temelenshi bener arutsütsüsa shisaliok dak tashi tulu aliba indang shia lir.

ANOGO ABEN TSÜNGREM DEN

Tsüngremer Tenangzükbatem au ta lir

Kechiaser Tsüngrem tenangzükbatem kwisüsa lidir ajak Khrista nung au ta lir. Anungji dang Tsüngrem sentsüwangshi atema onoki Khrista ajanga Amen ta ashir. 2 Korint 1:20

Tsüngremi Pa tenangzükbatem ajak ayur. Kodang asenoki Khrista den telungjem nung jajadir, Laishiba nung Tsüngremi nangzüka aliba ajak asenok den lir ta asenoki tejangja metet. Asenok taküm asoshi nangzüka akaba Laishiba nung bushitsü aser tenangzükbata shiaji shisadangtsü asoshi Lai azüngtsü iba ochi yagi asenok ajungshidaktsütsüla.

Nenoki ni mulungba langka asüngdangra, nenoki kechi asüngdanger aji ni agütsütsü ta Yisui nangzüka (Yn. 16:23b). Iba tenangzükbata Khristan shia dang nangzüka. Nai Tsüngrem dang asüngdang iba tenangzükbata ne taküm nung amshira Pa telangzübaji majangshira, iba jagi Tsüngremi ashiba memelenshir. Iba tenangzükbata kechiba ne taküm nung mataloker ta nai Tsüngremer telangzüba bushitsü akok.

Pauli tenangzükbatemji pa taküm nung tendangogo aser tenangzükbata ajakji kanga ochi ta pai kuli agütsü. Iba jagi pai Tsüngrem taochi talubusa Khrista nung asenok tsütsü takar aliba (Ef. 3:7) aser mejembitetba Khrista rongsen indang pai jembi (Ef. 38). Pauli Tsüngremer tenangzükbatem rongsen ngutet aser iba nung talubusa pelaa ali.

Ne taküm nung Tsüngrem tenangzükbatem ajunga matalokaka tasü meiti mesüra tatasa makai teli. Iba ochi tuluba renema akaba agizüktsü asoshi Tsüngremi ne taküm renemdaktsüner asütsü akok. Na Kibuba anasa jajaang, mapang nung ne taküm nung Pa tenangzükbata nung süngjang atangba nai angutsü.

Bangladesh nung Khristantem tetsübu nung dang alir

January 30, 2026: Bangladesh nung Khristantemi, 2024 küm August ita nung Ato kilonser Sheikh Hasina-i aniba sorkar atsüngdokba sülen Khristantem tetsübu nung dang alir, ta metetdaksü.

Bangladesh nung tang Khristan 500,000 jungnüa lir aser ibaji linük nung nütsüng shilem 1 dang nungi tajemba lir.

Khristan lenirtemi, Bangladesh nung Khristantem amokmerenba, Khristantem amakba aser sendokba ajanga Khristantem aika tetsübu nung dang alir aser aikati pei kidang nungi mayazüker, ta metetdaksü.

Muhammad Yunus-i aniba interim sorkar yimsüsüba kübok Hindu nunger aser Khristantem densema nütsüng ajema alirtem anema inyakba kanga bulua kümogo.

Khristan lenirtemi ashiba agi, Bangladesh nung

Khristantem aikati parnok anema inyakba osang memetetdaksür.

2024 küm August ita nungi tenzüka Hindu teloktemibo Bangladesh nung Hindu nungertem anema inyakba osang aika metetdakja arur, ajisüaka Khristantem anema inyakba osangbo aika temai madoker, ta Khristan lenirtemi metetdaksü.

Bangladesh yimtiba, Dhaka nung Khristan school ka nung tesayur kati, "Onok tetsübu nung dang alir. Arogotem mita repranger, Tenla kidang amokmerenba shidi yutsür aser Khristantem aikati sadoksadoka mesenzüketer," ta ashi.

2025 küm tatembanglen Dhaka nung bomb amshia Khristan rejutem amak, aser item rejutem rognnung Roman Catholic school ka aser Holy Rosary Church densema lir.

Item tatalokba nung shinga meyiru, ajisüaka ibaji ajanga Khristantem aika tsübudaktsüogo.

Bangladesh nung telok balalai Notre Dame College aser Holy Cross College na densema Khristan reju aika amokmerenogo.

January 1 nü Satkhira district kübok Tetulia yimdak Khristantemibo longkak aita liasü.

Khristan kati, "Nisung 50 shi süng aser hadir balala amer auba sülen onok amak. Onoka iba linük sensotem lir, anungji onok nem ochi temeden agütsütsüla," ta ashi.

Joko Khristantem aikati tetsübu nung sarasadem sentongtem aser Khristan benjungtem nung shilem magir, ta Khristan lenirtemi metetdaksü.

Pastor temi ashiba agi, talisa Islam yimsü toktsür Khristan

yimsü agizükertem aser tribal Khristantemi timtem tuluba ajangshir.

Tesem aika nung Khristantem kidang nungi auyaba, Tenla ki rongdoktsüba aser Khristantem amokmerenba osang aika lir.

Bangladesh Christian Association nung Tir, Nirmal Rozario-i, "Khristantem maneni amaker, ajisüaka aibelenertem nem temerenshi magütsür. Onoki item tatalokba bushisüngdangtsü aser security akhanger," ta metetdaksü.

February 12 nü Bangladesh nung general elections agitsü lir, ajisüaka minorities kanga amokmerenba ajanga election nung shilem magitetsüa akok, ta lenirtemi metetdaksü.

Meimchir temeden atema inyakertem aser linük balala nung sorkartemia Bangladesh sorkar dang minorities kümzüksü atema

inyakdaktsüner, ta shiogo.

Bangladesh nung pastor kati, "Tangbo onok ajem-ajema aser kanga kümdanga alir. Ajisüaka tamang tetezü tetsübu masü. Onoki taküm akhümкета liner aser ozüng kübok teküzmükba aginer," ta metetdaksü.

Bangladesh nung Khristantemji teimbaka Garo aser Santal lisopurtem lir aser Bengali nunger Khristantema aika lir. Dhaka, Gazipur, Chittagong, Barisal aser Khulna yimtitem nung Khristan nütsüng aika lir.

Alima nung Khristantem alitsü atema linük tamajungtiba 50 rongnung Bangladesh ya jenjang 24buba nung lir (Open Doors World Watch List (2025).

Iba linük nung talisa yimtenren tashi meiti aliba mapang nung Khristantemi reshikangshi kanga ajangshir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tzübangshishi


(adj) Tzü timleni meyimi ayimba ayong (unnatural river course)

* Tzübangshishi len ayimba ayongji asenoki ashishia bilemer

Tzübangtang

(n) tzü nokdang, ayong nokdangba (dam)

* Asenoki tzüla ayong nung tzübangtang yanglur light adokdaksütsüla.

OLONG PAITEP # 7400**TIPIEN**

1. Ozü tashikang aser tepenjok - (4)
6. Tarutsü indang ashi - (4)
7. Yimer ajak - (7)
9. Süngdong tetenzükda - (4)
11. Nokleptsü nailokdak - (7)
12. Tebang nung enok - (4)
15. Tsürabur nungi lemsükba - (7)
17. Tetsür tanur dang ajaba - (4)
18. Shirang ajung - (4)

LANGTSÜNGLEN

2. Pei tasoli - (3)
3. Iba anogo - (4)
4. Telemsa / Lemdanga ayuba - (6)
5. Maneni - (3)
7. Tekaratiba nung - (5)
8. Ki tema - (5)
9. Temejung - (5)
10. Teimla ayu - (5)
11. Tajatsü - (6)
13. Hai ta ashi - (4)
14. Anogo semer ka - (3)
16. Tashi balaka - (3)

OLONG PAITEP # 7399 TELANGZÜBA**TIPIEN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Süjak, 10. Aonung,
11. Dokan, 13. Tinu.

NAI-A YA METETTER MA

Manchester, England nungi arishi küm 2 tain Jude Owens-i Guinness World Record la yangluogo aser iba ya 'youngest person to make a snooker double pot' indang lir. Jude ya arishi küm 2 ser anogo 261 tain lir aser cue ball khi strike asü dang pockets ana telungi ball ana idaktsü.

NE nung Mizoram-i mezü ngbuba 'Girls in Aviation Day' amung**Aizawl, January 29, 2026****(Agencies):** Northeast nung mezü ngbuba 'Girls in Aviation Day' amungbaji Mizoram state lir.

January 29, 2026 nü Confederation of Indian Industry (CII) aser Women in Aviation International (WAI) yaritepa iba sentong ya Information and Public Relations Department hall nung ayonga agiogo.

Iba sentong nung high schools aser higher secondary rejutem nungi kaketshirtem

aden aser pilots, engineers o aviation professionals kümnürtem asoshi sabang tajung ka liasü.

"India indang regional aviation roadmap nung Mizoram ya tongtipang tesem ka nung lir. Iba atema government, industry aser professional teloktem tsü ngda tesentaktep alitsüla aser lanurtem, talisa tetsürtemi aviation amala wadang nung shilem agitsüla" ta School Education Minister Vanlalhlana-i ashi.

Iba sentong nung interactive sessions agia liasü aser industry experts-i aviation indang tesayuba aika agütsü.

Northeast ajungalen aviation-led development tashi itdaksütsü atema iba sentong ya shilem ka liasü ta CII Executive Officer Lalchhunli-i ashi.

Women in Aviation International-ia awareness programmes, mentorship aser leadership opportunities ajanga tetsürtem nem tashi agütsütsü alizü ng aliba lemsatep.

SpiceJet-i Imphal den Kolkata, Guwahati, Mumbai sendakteptsü**Imphal, January 30, 2026****(Agencies):** Budget carrier SpiceJet-i Imphal nungi senzütsü aser Northeast nung air connectivity ulushitsü indang osang metetdaksüogo.

February 10, 2026 nungi tenzüka SpiceJet-i Imphal nungi Kolkata, Guwahati aser Mumbai tashi senzütsü. Manipur nungi India yimti tulutem den air connectivity

junga maliba mapang SpiceJet-i Boeing 737 aircraft service tenzütsü.

Kolkata aser Guwahati tashi aoba passengers-i non-stop flights angutsü aser Mumbai tashi aoertemi Kolkata nung khi anenzükba dak alaka single-aircraft journey asütsü ta SpiceJet-i metetdaksüogo.

Iba ya Manipur asoshi kanga tongtipang lir kechiyong air

travel kangabo mali. Daily services ajanga sensotem, kaketshirtem, medical travelers, sorkar ketdangsürtem aser shishilembartem kanga ajangzüksü ta SpiceJet-isa ashi

"Onoki Imphal tashi flight tenzüka ya Northeast nung onok maparen ulushiba nung tongtipang alizü ng ka lir" ta SpiceJet Chief Business Officer Debojo Maharshi-i ashi.

Gaurav Gogoi-i asür Zubeen Garg nem Bharat Ratna meshitsür**Guwahati, January 30, 2026****(Agencies):** Jorhat nungi Congress MP Gaurav Gogoi-i Prime Minister Narendra Modi dang Assamese kentener aser sobaliba nisung Zubeen Garg nem Bharat Ratna agütsütsü atema shidi zülüogo.

Gaurav Gogoi ya Lok Sabha nunga Congress Parliamentary Party Deputy Leader lir.

Zubeen Garg ajungbena asüba ajanga Assam aser North East ajungalen pa mang ayimer. Pa asüba ajanga sobaliba nisung tongti ka akoksaogo aser pai northeast nung dang masü saka linük ajungalen nisungtem atsür aru ta Gogoi-i shidi nung shia lir.

Garg ya artist tajung ka dang masü saka Assamese maitsü aser sobaliba atema nisung ka liasü. Pai national aser international sabangtem nung maitsü aser sobaliba ajungket ta Gogoi-isa ashi.

Gogoi-i Zubeen Garg nem Bharat Ratna agütsütsüba ya institutional forums balala nung jembia aruogo aser December 3, 2025 nü Lok Sabha nung



Zero Hour mapanga benokogo ta paisa ashi.

December 4, 2025 nü External Affairs Minister S Jaishankar dang Garg asüba dak sendakba osang tejangja meshia shidi zülü ta Gogoi-isa metetdaksü.

Zubeen Garg-i Indian music aser culture nung tongti shilem agi aser pai Assamese oshi aser North East indang ola India aser alima nem sangoktsü. Pa nem Bharat Ratna agütsütsü kanga temsüa lir ta Gogoi-i PM Modi dang ashi.

Külen, Union Ministry of Home Affairs-ia Gogoi ajanga Parliament nung iba onük

benokba atema telangzüba agütsüogo.

Minister of State for Home Affairs Nityanand Rai-i January 2026 nung Gogoi nem telangzüba agütsü.

Bharat Ratna agütsütsüba ya Prime Minister-i India President dangi abener aser formal recommendation process kecha menü ngdaker ta Rai-i Gogoi dang ashi.

Nübertemi Zubeen Garg senmang atema kanga bilemba mapang ka aser Assam o North East nung alirtemi pa nem civilian honour tematiba agütsütsü akhangba mapang ka Gaurav Gogoi-i iba shidi zülüogo.



RAJESHWARI KARUNA SCHOOL TULI

ADMISSION OPEN

2026-27

- AFFORDABLE QUALITY EDUCATION
- TRAINED AND RESPONSIBLE TEACHER
- REGULAR ACADEMIC AND MORAL GROWTH
- FIELD TRIPS AND EXTRA CURRICULAR ACTIVITIES
- ONE TIME FREE HOSTEL ADMISSION FOR FIRST 50 APPLICANTS
- ADMISSION CONCESSION FOR FIRST 10 NEW DAY SCHOLARS.
- DIRECT ADMISSION FOR STUDENTS SCORING 80%+

CONTACT NUMBER:
8974177954 / 8415838277.

ENTRANCE TEST
14TH FEBRUARY
10 AM - 1 PM
OR
11 AM - 2 PM



Kaket shisatsü bushiba den külemi Tsüngrem O nung taküm intetdaksür

SDF-i Syria sorkar indang sepai den lokteptsü mulungogo

Damascus, Aenjeti/January 30 (Agencies): Syria nung Kurdish nungeri aniba sepaitemi Syrian army den lokteptsü sorkar den tezüngzüktep ka agiogo.

Damascus nung aliba sorkar ya linük north tsütsü Kurdish-i aniba Syrian Democratic Force (SDF) den hopta ishika rara arur, shirnok December 2024 nung Bashar al-Assad atsüngdokba sülen linük ajunga amokbangtsü meranger.

Ajisüaka hopta ishika jakdang ceasefire yangluba sülen Kurdish military forces ya army den phase lemsar lokteptsü tezüngzüktep yanglu, ta SDF ajanga Hokulbarnü sangdong ka nung ashi.

Ibajisür mapang tatsüka lir Syrian state TV-ia agreement ya shidak ta jangjatsü, kong Kurdish civil institutions ya start structures den lokteptsü, aser ibaji tang nungi mapa kuma inyaksü ta sorkar ketdangsür temi ashir.

Tesüiba hopta asem tsüngta

army temi SDF nungi linük north aser northeast tsütsü alinük tuluka rakzüka sülen iba agreement ya yanglu.

Kanga aritepa tensa melenshiba ajanga interim President Ahmed al-Sharaa tashi itshiba nung yari, shirnok Kurdish fighter aser political entities den ita aika jembishinüa aruaka central institution nung melungjemtetba asoshi tezü tanga liasü.

Iba agreement kübok sepaitem front lines nungi ainshitsü, sorkar units tem Hasakah aser Qamishli yimti tiyongleni yoktsü aser item tesem nung aliba security forces tem lokteptsü.

SDF brigades asem densema military division ka kumtettsü. Ano Ain al-Arab ta ajaba Kobane jila nung aliba brigade ka Aleppo indang governorate den affiliated asütsü ta SDF sangdong ajanga ashi.

Syria northeast tsütsü

Kurdish teloki anir amenokba governing institutions tem state institutions den lokteptsü.

Linük den Kurdish political aser military bodies lokteptsü tezüngzüktep ka March 2025 nung mezüng züngzüktep, saka mapa kuma inyakba nung terenlok kangabo meliasü.

Tawa US Tir Donald Trump-i al-Sharaa den phone ajanga jembidang Syria interim president-i litsü-lika lungjemtsü, national sovereignty aser sorkari par institutions wazüka ayutsü jangraba aser civil peace asoshi bendanga agütsür inyakba indang lemsatepa liasü.

Interim president al-Sharaa yagi ajaklen bendanger den Syria tesendaktep yanglutsü asoshi maneni inyaker.

Pai Bodhbarnü ang Moscow nung Russia Tir Vladimir Putin ajurua liasü, kechiaser Kremlin-i Middle East nung inyakyim asoshi Syria nung military bases amenokner.

Trump-i mebishiba sülen Russia-i Ukraine amakba anena atatsü mulunger

Moscow, Aenjeti/January 30 (Agencies): February 1 tashi Kyiv nung amakba anena atatsü US Tir Donald Trump-i mebishiba nung mulunga agizükogo ta Russia-i Hokulbarnü ashi.

Ukraine nung kanga mokongba ajanga ni mebishiba, ta Trump-i ashi, aser Kremlin ketdangsüribo linük ana tsüngta jembishinüba yaritsü mera ka ama ashir. Iba temebishiba ya kodang agütsü'ar US lenir mesüra Russia-i tejangja mashi.

"Jembishinütsü atema tensa tajung adokdaksütsü mechi Tir Trump-i Tir Putin dang

February 1 tashi Kyiv nung mamaktsü adangji nung mebishiba liasü," ta Kremlin odongtar Dmitry Peskov-i ashi.

Peskov-i temokong indang meshisem aser ibai yimtenden tsütsü mebishiba ama ashi.

Russia-i Ukraine indang energy infrastructure nung amakba ajanga Kyiv nung nisung meyirijang aika tang temokong mapang tatsük mali timtemtar.

Ukraine ketdangsürtemi temperature ya minus 30C tashi mokonga akumtsü ta tekum dangtsü shia lir aser temokongtiba ya February 1 nungi tenzüksü imlar.

Hokulbarnü Trump-i White House cabinet senden ka nung pai Putin dang kanga mokongba mechi Kyiv aser anasa jila tem nung hopta ka mamaktsü asüngdanga liasü ta ashi.

"Ni Tir Putin dang Kyiv aser jila balala nung hopta ka mamaktsü asüngdang," ta US tiri ashi. Kyiv nung missile aser drone amshia amakba kanga ajemogo ta Ukraine-i tan hopta shia liasü, kong rara küm pezü shi jakdang tenzüker mapang shia maka arur. Russia-i Ukraine yimtiba nung kanga sashia amakba ya January 23-24 aonung liasü.

Russia-i US-Iran jembishinü akatsü ajungshir

Moscow, Aenjeti/January 30 (Agencies): Brehostibarnü Russia-i Iran aser United States tsüngta jembishinü akatsü lenmang lir ta ashi aser Tehran anema tashiyim amshira timtem tulu alitsü aser Middle East ajunga nung mepetmesü adoktsü ta tekum dangtsü ashi.

US Tir Donald Trump-i Iran dang nuclear nok-nü indang jembishinü langpangi arung, aji

mesüra US-i amaktsü akok ta shir anogo ka lir Kremlin odongtar Dmitry Peskov-i iba o ya shia liasü.

"Onoki telok ajak dang atsüanem akatsü aser ken o angatetteptsü asoshi tashiyim amshiba yutsütsü maneni ayongzüker. Jembishinü akatsü ano lenmang sadema lir... Asenoki jembishinüba nung rangloktsüla," ta Peskov-i

osangbener dang ashi.

"Tashiyim mapa ajanga region nung mepetmesü ang adoktsü aser region ajunga nung security system tashi mait akumtsü."

Ukraine nung rara tenzüka sülen Russia ya Iran den tesendaktep tajungba kumogo aser January 2025 nung Islamic Republic den küm 20 tesendaktep balala atema züngzüktepa lir.

MOLUNGNEN O



Asür Wt. Ramokchila Lemtur (Longmisa)
15th November 1930 - 8th January 2026

Arishir asür **Wt. Ramokchila Lemtur** (Longmisa), akümüli wadang tempangba anogo nungi asüko mapang piyong lokti tentet balala, kija kibong aser kiyong-kinar shrinokisa nübu, rongsen, shisatsü aser sarasadem nung yaritepogo, nenok ajak dang kanga pelaba lemsateper. Teyanglur Tsüngremi nenok lenla ajak nung talubosa moatsütsü onok tamang sarasadem.

- Temeim Chirnur, Semchir aser Kinungertem.

Government of India/ भारत सरकार
Ministry of Communications/ संचार मंत्रालय
Department of Telecommunications/ दूरसंचार विभाग
Office of the Jt. Controller of Communication Accounts/ कार्यालय संयुक्त नियंत्रक संचार लेखा
North East -II Telecom Circle/ उत्तर पूर्वी दूरसंचार सर्किल-द्वितीय,
OCB Exchange Compound, Dimapur -797112/ बीएसएनएल, ओसीबी एक्सचेंज बिल्डिंग, दीमापुर -797112
Telephone Number/ दूरभाष: 03862 229061; Toll Free No. 1800-345-3809
Email Address/ मेल पता: ccane2pension@gmail.com, ccane2-dot@gov.in

HOLDING OF PENSION ADALAT ON 04.02.2026

It is hereby informed that Pension Adalat for DoT and BSNL pensioners of NE-2 Telecom Circle will be held on 04.02.2026 at the meeting hall O/OAGM(OP), BSNL, Mokokchung, Mokokchung-Nagaland-798601, from 11 A.M onwards.

This event is organized to address and resolve pension-related grievances. All Pensioners are requested to send their grievances, if any, through email/ SAMPANN / Speed-Post / by hand / Whatsapp. For more information, kindly contact Toll Free No. 1800-345-3809 / 03862-229061.

(Chandan Kumar Nath)
Sr. Accounts Officer (Pension)
O/o Jt. CCA, Dimapur

EU-i kiralongrar list nung Iran indang IRGC bendenlokogo

Brussels, Aenjeti/January 30 (Agencies): Tawa Tehran-i longkak aiter pua merenshiba nung telangzüba agüja European Union-i Iran indang Islamic Revolutionary Guard Corps (IRGC) ya kiralongrar list nung bendenlokogo.

"Tashiyim amshia azüokba melangzüi metoktsütsü," ta EU lenir Kaja Kallas-i ashi aser iba mera ya ajanga IRGC ya al-Qaeda aser Islamic State telok amala jihadists den sako jenjang nung ayutsü ta ashi. IRGC ya Iran nung mitkar, rongsenketzüng aser yimten tashi tuluka lir.

EU-i iba telemtetba agiba ta tasak ka lir aser aibelen tulu lir, ta Iran indang Foreign Minister Abbas Araghchi-i ashi.

December aser January ita Iran nung nüburtemi longkak aitba mapang IRGC densema security forces temi longkak aiter meyirijang aika tepsetogo ta human rights telok temi asadangteta lir.

Brehostibarnü Brussels nungi jembidang, France Foreign Minister Jean-Noel Barrot-i iba ya Iran indang modern history nung azüdokshia azüokba tamajungtiba lir aser

mapa tamajung inyakba atema memerenshi metoktsütsü, ta ashi.

Taoba mapang France-i IRGC ya EU indang terror list nung bendenloktsü memulungi liasü, kechiaser ibaji ajanga Iran den yimten tesendaktep ajunga tembangtsü ta tsüboia bilem.

Ajisüaka Bodhbarnü parnok temulung melenshiba iba telok ya blacklist asütsü merangba nung tashi agi nokdak, koba Italy-i anir inyaka liasü.

"Shir yimli nung pei nisung meyirijang aika tepseter, aji par samatsü asoshi inyakba lir," ta Kallas-i social media nung tongmelang agi sangdong ka agütsü.

IRGC ya kiralongra mapa inyakba telok tem indang list nung bendenlokaka Iran den diplomatic channels lapoka alitsü imlar ta lai ashi.

EU-isa Iran nung entities trok aser nisung 15 nem sanctions tasen agütsü aser yangji Interior Minister Eskandar Momeni, Prosecutor General Mohammad Movahedi Azad aser presiding judge Iman Afshari dena lir.

(Maneni tapak 8 nung...)

LKM pur 34 buba saisapong benjong takok manung mungogo

Chuchuyimlang, Jan. 30 (TYO): Langpangkong Kaketshir Mungdang (LKM) pur 34 buba saisapong benjong January 29 & 30, 2026 anogo ananü "Mungjen Mesemshidi" omen dak rangloker yangi Langpangkong Tzükong Government High School Ground, Chuchuyimlang nung kaogo. Iba benjong nung LKM kübok yimtsüing balala nungi adenshia kanga longsotepa asaya-a mungogo.

Taküm asoshi shimtetba asayatemji - Football (teburtem) aser volleyball (tebur & tetsür) na liasü. Football asaya nung yim 12-i shilem agi aser item rongnung tesüsabuba jenjang atongerji Merangkong o Chuchuyimlang na liasü. Tena final asayaba, Merangkong goal 1-0 agi Chuchuyimlang madak koka taküm football trophy parnoki bener ogo. Iba senti goal kaji Merangkong nungi jersey No. 20, Noklensunep-i mezüing asaya tesadang tenzüker minute 10 nung idaktsü.

Semifinal nung Merangkong-i Longkong goal 1-0 agi tsükdaktsü aser tanabuba semfinal nung Chuchuyimlang o Mongsenyimti na asayaba draw asü, aser penalty metsütepang



Football champion Merangkong telok den sentong akümdong PA to DC Mokokchung, Alemtetba aser tayongertem senpet agütsüba mapang tangokba noksa nung angur. Chuchuyimlang, 30th January 2026.

Chuchuyimlang-i akok.

Nija senpet parnok yagi agizük - Best Goalkeeper: Moalemba (Chuchuyimlang), Best Defender: Meyinungsang (Mongsenyimti), Most Promising Player: Tensuba (Merangkong), Player of the Tournament: Noklensunep (Merangkong), Highest Goal Scorer parnok aseme angu: 1. Noklensunep (Merangkong), 2. Takotuba (Mongsenyimti), aser 3. Arnokdang (Merangkong).

Volleyball tebur final Changtongya o Merangkong na asayaba, Changtongya-i points 25/12, 25/19 & 25/20 agi Merangkong madak takok tulu nguteta liasü. Volleyball tetsür

Salulamang o Merangkong na asayaba, Salulamang-i points 25/16, 25/16 & 25/18 agi Merangkong madak takok angu.

Volleyball nung tebur nija senpet - best spiker: N u n g s a n g y a p a n g (Changtongya), best setter: Sarilepzung (Changtongya) aser Player of the tournament: Limamoa (Merangkong)-i agizük aser tesürtem - Best Spiker: Sashirenla (Salulamang), Best Setter: Sungjemtola (Salulamang) aser Player of the Tournament: Toshisangla (Merangkong) par aseme agizük.

Football aser Volleyball

asaya ajak nung takoker champion, atongdakba runner-up aser nija senpet angurtem nem senpet sen den trophy aser kulikaket agi senpettsü. Taküm Merangkong takok teimtiba nguteta taküm parnoki overall champion senpet agizüka liasü. Taküm iba saisapong benjong ya Chuchuyimlang Rionsanger Putu Mendeni agizük. Football aser Volleyball asayatem Mokokchung District Football Association (MDFA) aser Mokokchung District Volleyball

Association (MDVA) temzüing kübok asaya-a liasü.

Iba asayamung ya tongtibangsa Langpangkong lima nungi tangar menepa saisaponger adokdaksütsü nükjidadong yur ayongzüka akar. Iba asayamung akaba ajanga saisaponger tajung aika adokogo aser asayar karbo mapa dena anguba osang ajanga angazüker.

Saisapong benjong shibangba aser senpet agütsüba sentong nung P.A to DC Mokokchung, Alemtetba tetushi tesemdanger liasü. NSF Info. & Publicity Secretary & taoba LKM Tongti Zülur - Temjentoshi, Chuchuyimlang Local Planning Committee Convenor - Rongsenlemba, LKM Sports Festival Planning & Technical Committee Convenor - Imkongtemsu Jamir, taoba LKM Metetpela Zülur - Imliwati, LKM Saisapong Zülur - Imtinüklu Jamir, CTBA Pastor - Rev. Temjemlemzüing parnokia sentong nung shilem balala agi aser Kr. Sentikala Jamir-i ken tajung ka aten.

BENDANGLI OSANG :

Tapak 7 nungi...

EU-i kiralongrar list nung Iran indang...

"Yimjung nung longkak aiter tashiyim amshia azüokba aser political activists aser human rights defenders tapi agi apuba nung parnok ajak dena lir," ta bloc sangdong ka nung ashi.

EU indang terrorist list nung aliba lokti tentet tem ya senzüsempingba nokdang aser parnok indang rongsena soita ayur, koba parnok yariba networks tem agientsü nükjidadong nung lir.

Iran nung tashi tulutiba armed force, IRGC ua 1979 revolution sülen mapang tatsüka tsünga linük inang Islamic system kumzüka ayutsü mechi tentet. Iba telok nungya sepai 190,000 shi alitsü südi ta asadangteta lir aser parnok ya ali, anüing aser tzüyim nung tashi lir aser Iran indang tongtipang nok-nü tem ketdang asür.

Parnoki bendang lima nunga Iran den sendaktepa aliba sorkar aser armed groups nem senotsü, nok-nü, technology aser shisatsü agütsür aser Iran telung nung paramilitary Basij Resistance Force parnoki amshir, kong züngsem meyirijang aika lir aser yimten anemer nokdangtsü asoshi amshia

arur.

Australia, Canada aser US linük temibo IRGC ya kiralongrar telok ta sangdonga lir, saka UK nungi iba nüngja agüja mali.

Bodhbarnü UK Deputy Prime Minister David Lammy-i Iran nung tashiyim amshia yimjung nung longkak aiter azüokba aitsü saka lokti ka nokdangtsü atema mejembitsü sorkar sentong nung lir ta shia liasü.

Rara nung amshiba rong telok tuluka Iran leni tashi tulu, tejangraba aser nükjidadong yur kanga kera otar ta US Tir Donald Trump-i tan hopta tetenzüklen ashiba sülen EU-i iba osang ya sangdonger.

Trump-i Iran dang par nuclear sentong indang jembishinütsü mapang tembangtar ta tekumdagtsü ashi aser Tehran dang langpangi arutsü ajungshia liasü.

Brehostibarnü US tir-i Iran anema mitkari mera magitsüsa maneni nuclear deal atema jembishinü akatsü imlar ta shia liasü.

"Ni mezüing kümsük mapang mitkar yanglu aser Iran ta ajaba tesem ka tsütsü telok ka otar, aser onoki aji mamshitsü imlar," ta Trump-i osangbener dang

sentong ka nung ashi.

Iran foreign minister-ia par linük indang armed forces tem trigger nung temeyong inoker tashiyim amshiba nung tangsa tashi tulu amshia telangzüba agütsütsü renema lir ta ashi.

Asen region ajunga nung rara madokdaksütsü asoshi inyaksü melen Europe ya mazüing mi tali jangrudaktsür, ta Aragghi-i ashi.

Ita tetenzüklen longkak aiter anema Iran ketdangsüri tashiyim tali amshiba ajangshia alirtem yaritsü atema Washington teka sangshitsü ta Trump-i nangzüka lir.

Iran ketdangsüri internet shibangba ajanga sorkari longkak aiter azüdokshiba tejangja memeteter.

US nung aliba Human Rights Activists News Agency-ibo longkak aiter 5,925 densema nisung 6,301 dak tema tepsetba jangjaogo ta ashir aser Norway nung aliba Iran Human Rights-ibo nisung 25,000 dak tema sür alitsü ta ashir.

Iran ketdangsür temi nisung 3,100 dak tema tepsetogo saka timba security personnel mesüra repranga alirtem longkak aiter temi tepsetba lir ta ashir.

5 buba 3x3 National Basketball Championship nung Nagaland-i otsü yanglu



Dimapur, Aenjeti/January 30 (TYO): Delhi nung tebur aser tetsür atema 5 buba 3x3 National Basketball Championship asayaba nung Team Nagaland-i otsü tasen ka yanglua liasü.

Nagaland ya Group E nung Jharkhand, Chhattisgarh, Himachal Pradesh aser Assam den liasü aser parnoki kanga meranga asayateta par telok nung tematiba jenjang tongteta Pre-Quarterfinals atong, koba Nagaland indang basketball otsü nung mezüingbuba alitsü.

Brehostibarnü mezüing asaya nung Nagaland-i 21-11 agi Chhattisgarh madak takok angu, kong Atseizo-i points term Cuwe-i trok aser Sede-i points pongu ngua liasü.

Iba sülen Himachal Pradesh madak 21-11 agi takok angu, kong Cuwe-i points tenet, Sede-i points ti, Atseizo-i pezü aser

Yeye-i points ana ngua liasü.

Jharkhand den asayaba mapang 21-4 agi ako, kong Cuwe-i points ti, Atseizo-i points trok, Sede-i pezü aser Yeye-i asem ngutet.

Hokulbarnü Assam den asayaba mapang 21-11 agi akok, kong Atseizo-i points ter, Sede-i trok nguteta Group E nung Nagaland tematiba jenjang atong.

Pre-Quarterfinals nung Nagaland-i Karnataka ajurua parnoki kanga meranga asayaka 11-17 agi tsüka liasü, kong Atseizo aser Cuwe nati points pongu-ngu ngua liasü.

Team Nagaland par group nung tematiba jenjang tongteta knockout stage tashi tongtetba ya Nagaland indang basketball otsü nung mezüingbuba alitsü.

Teyari shidak lira, Nagaland ya basketball terenlok tsütsü linük asoshi model ka akumtsü, ta sangdong ka ajanga ashi.

BILEMDANGANG

"Tamajung melena tamajung lepa agütsütsü temerang."